

Imperii in Græciam translata, quæ novas Juris mutationes induxerit, tum ob imperitiam Triboniani & sociorum, ubi expendit Triboniani avaritiam, publicumque condendi & abrogandi leges mercatum, ut non abiret dies, quin legem figeret, prout privato cuidam expedire videret. Ostendit deinde, quod non minor Justiniani iniquitas, infelicitas temporum quibus bonæ literæ in Græcia extinctæ & Juris Romani prudentia diluvio barbarie Gothicæ sepulta esset; Inscitia item sedecim compilatorum, videlicet Græculorum, & ineptias suas in præfationibus Pandectarum & Codicis satis exponentium; in super precipitantia in duobus millibus confusorum Voluminum, brevissimo triennii spacio, instar eorum, quæ per cucurbitulam eliquantur, exstillandis &c. imprudentiam Jurisprudentiæ Justinianæ ad oculum demonstrent.

Cap. 12, pressius exponuntur desiderata in labore Triboniani, puta quod leges, edicta, scripta supprimi & aboleri curaverit, & centones tantum commentariorum reliquerit, non melius, ac si quis loco Homeri & Virgilii Eustathii & Servii Commentarios offerret. Deinde, quod omnes libros magnorum & vere Romanorum Actorum, Catonum, Mutiorum, Manilii, Cascellii, Serv. Sulpitii suppresserit,